

E mords Idee

Wie merr uns omm letzde Sunndaach omm Stommdisch getroffe hawwe, isch unn moi Kummbeern Schorsch unn Karl, unn noochdem jeder enn Äbbelwoi bestellt hadd seet de Karl: No Schorsch, was gibt's Neies? Hosde derr widder ebbes ausgedenkt?

Isch denk merr allsfort ebbes aus, gibt de Schorsch ze Antwort.

Ei was donn?, habb isch gefroochd.

De Schorsch hott sich umgeguggd, ob emm aach kooner zuheern dut unn hott gepischberd: Iwwer die selbstfahrende Audos.

No ja, moont de Karl, doodriwwer mache sich vill Gedonke: De Äbbel, de Daimler, de Al-Wazir und su Leit, was willsden du doo noch driwwer noochdenke.

Ja, pischberd de Schorsch weider, waaßde, isch habb e mords Idee ferrs selbstfahrende Audo, doo kann merr e Geschäft draus mache.

Donn muss dess ebbes gons Extras soi, saach isch.

Immer noch gons leise seet de Schorsch: Dess isses aach, weil beim autonome Fahrn, su heeßt die Sach, dusde in doi Smartfon oigewwe, wonn unn wo du abgehollt werrn willst unn zu dere Zeit kimmt e Audo vorgefahrn, ohne Fahrer.

Dess wisse merr, saach isch.

Donn dust oitippe wohie de willst, setzt dich ins Audo unn dess fährt los unn bringt Dich doohie, was de oigewwe host.

Also wo de hiewollst, aach des wisse merr all, liewer Schorsch, seet de Karl, dess iss alles nix Neies.

De Schorsch hott gegrinst: Falsch! Dess Audo fährt nitt doohie wo de hiewollst, naa, dess fährt doohie, was de oigewwe host.

Dess iss doch dess sellwe, saach isch.

De Schorsch hott noch mieh gegrinst. Ewe nitt. Unn jetz kimmt moi Idee ins Spill unn doodeferr muss isch Leit oistelle. Dort wo de jetz bist, doo wollsde joo nitt hie unn dess derrf doi Fraa nitt wisse. Also iwwernimmt ooner vunn moine Leit dess Weiderfahrn, duts neie Ziel oigewwe, du gibts emm doi Smartfon, falls dess geort werrn soll, bleibst im Audo sitze unn es fährt, no ja, saache merr mol in die Spillbonk nooch Wissbade.

Jetzt hott de Karl gelacht: Odder nooch Meenz in die rot Ladern.

De Schorsch hott aach gelacht: Siehsde, unn den Service loss isch merr gut bezahle, doo gibt jeder gern gut Geld deferr aus. Was haldern vunn dere Idee?

Großardisch, saach isch, unn wonn willsde doi Firma uffmache?

De Schorsch hott sich omm Kobb gekratzt. Dess iss dess Problem. Bis dess in zeh Johr mett dem autonome Fahrn suweit iss, bin isch zwaannneunsisch. Awwer die Idee iss doch gut, odder?

Jetzt habb isch mich omm Kobb gekratzt. Warum willsde donn wadde bis dess mett dem autonome Fahrn suweit iss? Fong doch jetzt schunn emol doodemett oo. Isch bin donn doin ersde Kunde.

Warum, frächt de Schorsch, wo willsden hie, was merr nitt wisse soll?

Jetzt habb isch misch umgeguggd, ob aach kooner zuheern dut. Nooch Goddelau unn dort gugg isch mich nooch emm Platz um.

Ferr dich? frächt de Schorsch

Naa, saach isch, ferr dich, du Spinner.

Eiern Honnes